

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ODLUKA

**O PRIHVATANJU ZADUŽENJA PO UGOVORU O FINANSIRANJU
IZMEĐU BOSNE I HERCEGOVINE I EVROPSKE INVESTICIJSKE
BANKE (EIB) ZA REALIZACIJU PROJEKTA KORIDOR Vc**

Sarajevo, septembar 2015. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Predstavnički dom Parlamenta Federacije Bosne i Hercegovine na _____ sjednici održanoj _____ i Dom naroda Parlamenta Federacije Bosne i Hercegovine na _____ sjednici održanoj _____ d o n o s i

ODLUKU

O PRIHVATANJU ZADUŽENJA PO UGOVORU O FINANSIRANJU IZMEĐU BOSNE I HERCEGOVINE I EVROPSKE INVESTICIJSKE BANKE (EIB) ZA REALIZACIJU PROJEKTA KORIDOR Vc

I.

Prihvata se zaduženje Federacije Bosne i Hercegovine (u daljem tekstu: Federacija BiH) po Ugovoru o finansiranju između Evropske investicijske banke (u daljem tekstu: EIB) i Bosne i Hercegovine (u daljem tekstu: BiH) za realizaciju Projekta Koridor Vc u iznosu od 100.000.000,00 EUR za Javno preduzeće Autoceste Federacije BiH d.d. Mostar (u daljem tekstu: JP Autoceste F BiH).

II.

Sredstva kredita iz tačke I. ove odluke koristit će se za realizaciju Projekta Koridor Vc – na dionici Počitelj – Bijača za poddionicu Počitelj - Zvirovići.

Svrha Projekta je podrška razvoju mreže autocesta u BiH, a ova kreditna sredstva namijenjena su za nastavak izgradnje prioriternih dionica na Koridoru Vc.

III.

Sredstva kredita iz tačke I. ove odluke, odobravaju se Federaciji pod sljedećim uslovima:

- iznos kredita:.....100.000.000,00 EUR
- rok otplate:..... 25 godina
- grace period:.....do 6 godina
- kamatna stopa:.....fiksna ili varijabilna, s fiksnim intervalom (dogovara se prije isplate tranše)
- dospijeća:.....godišnja ili polugodišnja rata u jednakim otplatama glavnice, u anuitetima
- iznos svake tranše:.....minimalno 5.000.000,00 EUR

IV.

Potvrđuje se da je razmatrana dokumentacija prihvatljiva za Federaciju, a posebno:

- Ugovor o finansiranju između EIB-a i BiH;
- Nacrt Supsidijarnog sporazuma između BiH i Federacije BiH;

V.

Sredstva kredita iz tačke I. ove odluke Federacija će na kreditnom osnovu prenijeti na JP Autoceste F BiH, koja je krajnji korisnik i dužnik po ovom kreditnom zaduženju.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija da sa JP Autoceste F BiH usaglasi i sklopi odgovarajući Podugovor o kreditu kojim će, u svrhu redovne otplate, definirati uslove vraćanja sredstava koja se prenose na kreditnom osnovu.

VII.

Daje se saglasnost za zaključivanje Supsidijarnog sporazuma između BiH i Federacije, kao i saglasnost za zaključivanje i usaglašavanje odgovarajućeg Podugovora o kreditu između Federacije i JP Autoceste F BiH kojim će se, u svrhu redovne otplate, definirati uslovi vraćanja sredstava koja se prenose po kreditnom osnovu.

Za potpisivanje Supsidijarnog sporazuma i Podugovora o kreditu, ovlašćuje se Federalni ministar finansija.

VIII.

Za realizaciju ove odluke i izvještavanje zadužuju se Federalno ministarstvo finansija, Federalno ministarstvo prometa i komunikacija i JP Autoceste F BiH, svako u okviru svoje nadležnosti.

IX.

Implementacija Sporazuma iz tačke I. ove odluke ne zahtijeva donošenje novih ili izmjenu postojećih zakona.

X.

Ova odluka stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE

Pravni osnov

Pravni osnov za donošenje ove odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrtu kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Donošenjem ove odluke stvara se osnov za potpisivanje Supsidijarnog sporazuma između BiH i Federacije BiH, a potom i Podugovora o zajmu između Federacije BiH i JP Autoceste F BiH, na osnovu kojeg će Federacija BiH sredstva zajma proslijediti JP Autoceste F BiH kao krajnjem dužniku i korisniku kredita predmetnog Projekta.

Sredstva zajma koristit će se za finansiranje Projekta Koridor Vc – na dionici Počitelj – Bijača, koji podrazumijeva izgradnju poddionice Počitelj – Zvirovići. Dužina poddionice iznosi 11,2 km. Poddionica počinje sa petljom Počitelj, udaljenom približno 1,8 km zapadno od naselja Domanovići. Trasa se pruža po počiteljskom platou prema jugu i kod sela Gradina skreće na zapad gdje prelazi preko rijeke Neretve sa sjeverne strane grada Počitelja. Prelaz preko rijeke Neretve, kao i magistralne ceste M17, zatim regionalne ceste i pruge Ploče - Sarajevo je ostvaren mostom dužine 980 m i visine stubova 85 m. Nakon toga trasa ulazi u malo nepovoljniji teren kojeg savladava sa dva kraća tunela (240 m i 460 m) i dva vijadukta (2 x 155 m). U nastavku, autocesta se pruža platoom planine Crna greda prema petlji Zvirovići (Međugorje) gdje i završava.

Obrazloženje pojedinih tačaka

Tačka I. je nužna kako bi se prihvatilo zaduženje Federacije BiH kod EIB-a

Tačkom II. potvrđuje se namjena utroška sredstava kredita.

Tačkom III. precizirani su uslovi kredita.

Tačkom IV. potvrđuje se da je dokumentacija parafirana tokom pregovora s EIB-om prihvatljiva za Federaciju BiH, što je uslov da BiH i EIB pristupe potpisivanju Ugovora o kreditu.

Tačkom V. se definira način implementacije Projekta, te da nije potrebno osigurati dodatna sredstva u budžetu Federacije BiH za ovu namjenu.

Tačkom VI. se definira obaveza Federalnog ministarstva finansija da s JP Autoceste F BiH usaglasa i sklopi odgovarajući Podugovor o kreditu.

Tačkom VII. daje se saglasnost za zaključivanje Supsidijarnog sporazuma o kreditu s BiH, Podugovora o kreditu između Federacije BiH sa JP Autoceste F BiH i ovlaštenje federalnom ministru finansija da u ime Federacije BiH potpiše iste.

Tačkom VIII. u okvirima nadležnosti definira se obaveza za realizaciju odluke i izvještavanje.

Tačkom IX. se potvrđuje da za implementaciju Ugovora o zajmu i projektu nije potrebno donijeti nove ili izmijeniti postojeće zakone.

Tačka X. propisuje stupanje na snagu ove odluke.